

I va sco unschì sche Adank organisescha


In patriot grischun che ha era in cor per la Rumenia

DA CLAUDIA CADRUVI / ANR

■ **Sch'i duai marschar insatge, dovri adina in organisatur dinamic. In tal tip è Hanspeter Adank. El è a la testa da l'Uniun grischuna dal conturn da Rapperswil.** Bunamain 400 Grischuns han fatg festa avant diesch dis en il «Kreuz» a Jona. Adank vegn anc ditg a sa regurdar, co la gliued è stada murquiet, cura ch'ìls chors han chantà. «Chanzuns rumantschas e talianas èn in garant per il success.» Quai ha Adank savì gia avant. Perquai ha el envidà gist trais chors, numnadamain il «Coro Alpestre», il «Chor viril grischun Turitg» ed il «Chor grischun da Winterthur». La fin finala è l'organisatur lura tuttina stà surprais da l'effect. Il publicum haja applaudì ditg, cunzunt per il chor viril cun sias chanzuns rumantschas, raquinta Adank. In tal applaus na saja betg la regla tar sairas da divertiment. Per buna luna han era procurà in pitschen teater e sa chapescha las tschaveras grischuna.

Chavrer daventa organisatur

«Tut è ì sco unschì», di l'organisatur satisfatg. Betg sulet la festa, mabain era l'acziun grischuna che la Pro Raetia aveva inizià l'emna avant a Rapperswil (LQ dals 13 da zercladur). Per Adank è quai in mussament che las uniuns grischunas da la Bassa han ina funcziun. «Sch'i sto esser, sa tegnan ils Grischuns ensemen. La festa ha mussà ch'i exista ina attaschadadad fitg profunda.» Adank viva dapi 35 onns en la Bassa. El è anc adina in veritabel Grischunais. Gnanca in smiul d'in accent ha prendì la colur a ses dialect grischun. Da quai è el losch. Adank è naschì il 1942 a Fläsch. Da sia giuventegna di el ch'ella saja stada bella, ma



Gia sco chavrer ha el chapì da diriger la muntanera. Oz stat Hanspeter Adank a la testa da pliras uniuns.

ANR

era criva. Mintga stad hai gì num dad ir a lavurar insanu'ater. Gia sco matet ha el fatg il chavrer ed emprendì da diriger sia muntanera en il dretg lieu. Pli tard ha el inditgà la direenziun en diversas uniuns.

Sto vesair culms

«Il mender che po chapitar ad in Grischun è questa tschajera l'entir enviern», raquinta el da ses emprims onns a Frauenfeld. «Jau sun bunamain mort da l'encreschadetgna.» A Frauen-

feld na fiss el mai restà l'entira vita. Per casualitad ha el emprendì d'enconuscher Rapperswil. Questa pitschna citad ha plaschì ad el. Na exnum pervi dal lai. A Rapperswil ves'ins culms. E tschajera n'hai er betg tanta.

Adank ha constattà ch'ìls Grischuns han in bonus en la Bassa. Quest bonus derivia da lur fidaivladad, punctualitad ed avertadad. Entras questas qualitads chattia in Grischun immediat contact e vegnia apprezzà dapertut. Che questa pretensiun constat almain

per Adank sez demonstreschan ils numerus uffizis ch'el ha admepli ils ultims onns. El è stà president en sia plaiv ed ha manà pliras uniuns regiunalas u chantunalas da sutuffizier.

Rumenia la segunda patria

«Tgi che giavischa ina communitad activa, sto far sez insatge», quest princip ha Adank adina vivì. El ha lavurà 34 onns en l'arsenal a Rapperswil ed è suenter stà tar la Swisscom. Dapi prest quatter onns è el pensiunà. Pervi da

ses princip ha el uss – sco um pensiunà – da far pir che mai. En tschintg uniuns Grischunas da la Bassa è el activ sco supstant, delegà u president.

Il pli bler da far dat dentant ses engaschament per la Rumenia. Là gida Adank dapi set onns a mobigliar scolas, spitals ed organisescha curs. Sias acziuns per la Rumenia funcziuneshan uschè bein ch'el di: «Quai è bunamain daventà in'interpresa.» Cun il temp è creschì era la simpatia per quest pajais. Oz è Adank na sulet in bun patriot grischun, mabain ha era obtegnì il titel da burgais d'onur en Rumenia.

«Ina buna maschaida»

«Nus avain 156 commembers», raquinta Adank da sia uniun. I haja gliued da mintga vegliadetgna e da tuttas professiuns. Ina giada il mais ha lieu ina canorta a Jona. Lura datti ina tschaina cun spezialitads grischunas. Duas giadas l'onni fan ins in'excursiun en il Grischun. Ina giada van ins a culm, l'autra giada visitan ins ina interpresa. Ina pitschna gasetta da l'uniun infurmescha davart occurrenz. Latun vegn cusseglier guvernativ *Stefan Engler* a visitar l'uniun a Rapperswil. El vegn a referir davart la muntada da la chatscha en il Grischun.

Tgi che s'interessescha per il «Bündnerverein Oberer Zürichsee und Umgebung» po sa metter en contact cun *Hanspeter Adank*, Eichwiesstr. 7, 8645 Jona. Telefon 055 214 39 00.